

GUITS NE GLO PQUIAA

PEDR

1 Bets, bzian, ¡diuzh to grëse to!

Naa nac Pedr, tib zha ne rxeel Jesús nonee Xtiidz Ndzon me lo miech. Laa naa rxeel tib guits rii ziaad lo to grëse to ne nac to zha Israel, no to stib ladz ben: zig nac nëz Pont, nëz Galás, nëz Capadós, nëz Asia ni nëz Bitin.

²Dios men ne nac Pxoze ne, ible me bzooblo to mazd padzeela, sac nanle me laa to gac xpëed me. Bdziñ dze, zeene laa me pxeel Espíritu Sant bleextso to laa to ngab xnëz me, zeena gban to zigne rnabey me, ni lozh csanmbe Jesús to; sac ible min co nacne bzhiee xchen me. Dios glu ganle pa lotaa noxco me to, zeena peet zhgab ctsebde to.

³Xquizh xquielnzaac Dios, Pxoze Jesús men ndzon ne rnabey ne, sac gon quia zdoo me ne ptsëe me lo xquielmban ne, rrieequia gol ne stib. Xquizh me bleeban me Jesús, sac gon ga rlu ib zgaa ne guielnzaac nroob ne no diidz gneedz me lo ne, ⁴guielnzaac cosi ncuane mbe naca, nacda ncuane nitlo, nacda ncuane gdzëelo, ni gbaa ga quianie mew.

⁵Ne squi dib zdoo to rnalo to me niina, gane quianap me to con grëtaa poder ne rap me, parne ygaa to guielnzaac co. Zeene laa dze co gdzin, zanlo to ganle zeene laa me ycaania to.

⁶Gacxe waa ine nley golgac. Nli zan to grë pe guielnë, per ncuane tib rded ga. ⁷Ib none gan to grë guielnë, parne ga glu dien pe nli dib zdoo to rnalo to Dios. Zig nac guii or, parne glu dien pe nli ora, none teda lo gui; scaquegaa to, none gan to guielnë parne glu to nli dib zdoo to rnalo to Dios; ni zig nac or, ncuane rnitlo ga. Grëse zha ne tibaque gnalo me, niicle mazdraa guielnë ne gan zho, gal dze ne guiaad Jesús stib, ine zunnon Jesús zho, sanglaa me zho, zley me gan me zho, sac blu zho nli dib zdoo zho rnalo zho me. ⁸Me i squitaa rleynie to, me i squitaa rnalo to, niicle ne gonde to me, niicle ne rande to me. Tib guielbley nrooba lo to, tib guielbley ndzona, nacda ncuane grieelo gnee to zha naca; ⁹sac gon, ne squi dib zdoo to rnalo to me, ib scaania me to.

¹⁰Grë zha ne biadteed Xtiidz Dios lo miech padzeela, bzeet zho laa Dios glu ganle pa lotaa noxco me ne, laa me csilaa ne lo dol; per ib biend zho dien zhapaa gun me. ¹¹Zeene bdeed zhiEspíritu Jesús guielbiini lo zho bzeet zho

ne ib laa Dios cxeel me, pe nac guielnè ne ted me, ni pe nac guielndzon ne guiaadnie me; gocladz zho niacnan zho dien cho nac men co, pa hor gac min co. ¹²Nacne blu Dios lo zho gocnan zho nacda ncuane gac len dze co, sinque haxta nele ygaa dziana. Sangué niina, nanwen to ganle laa grè min co gocle, lèè diidz cub co i gocnan to niina, gbaa biet Espiritu Sant bdeed me guielbiini lo zha ne biadneew lo to. ¡Ncuane ndzona, haxta grè anj! racladz tebaa zha gacnaraa zho dien zha naca!

None gban ne zigne racladz Dios

¹³Golquix biini xquielrien to sca. Tiblique golgun guic to ne laa to ygaa grètaa mine ral zdoos Dios gneedz me lo to, zeene laa Jesús guiaad stib. ¹⁴Zig grè mèèd ne ron xtiidz pxoz, sca nguzobdiidz golgac lo Dios; gundraa to grè ncuane ndzinlid ne been to zeene gard gunbey to me ga.

¹⁵Goltsoxco golban zigne racladz me, zeena ine mbe guiaan to lo dol; sac gon tel me, men mbe nac me, nacd me men ne rdziguien dol. ¹⁶Zigne zhobneeque lo Xtiidz me, zaatne rnee: “None guiaanmbe to lo dol, sac gon men mbe nac naa.” ¹⁷Pxoz to nac me, me rnalo to, nanle to zeene laa me gun guielwxtis, led yed me cue; mine been tib tib miech, zunquish me zhow. Golguien sca, golgon xtiidz me gzataa dze ne gbanse to lo guidzliu rii.

¹⁸Golsoladz Dios bleed to lo grè wseed ndzinlid ne psan grè xmengol to; nanwen to gozh brieed to ga; per pquiind me ncuane rnitlo zig nac pe dimi or, pe dimi plat; ¹⁹sinque laa me pquiin xchen ndzon Jesús. Ren ne bzhiee goc zig tib gon, zigne rgogon miech carner yeen ne mazdraa niow, carner yeen ne mazdraa ndaan parne guiaanwen zho lo me. ²⁰Padzeelale, haxta zeene gard cue guidzliu bzo me Jesús gac Jesús gon co, ni nligaa zeene laa dze co bdziñ laa Jesús baaad, baaadsanwen me to lo Dios; laa Dios been min co sacne rleynie me to. ²¹Gacxe waa, zrieelo dib zdoos to gnalo to Dios, mese none gliladz to. Me nac men ne bleeban Jesús, blu me ne men non nac Jesús.

²²Ni niina ne laa to mban zigne nac Xtiidz Dios, mine nac diidzli, laa zdoos to baaanmbele lo dol; nasi zrieelo gleynie to zha ne nacgrè to.

Dib zdoos to sca golleynie zho, ²³golguien ganle, tib guielmban cuble rap to niina, rrieequia gol to stib; per nacdraaw zigne gol to glo, sinque lèè guielmban qui bgaa to zeene bliladz to Xtiidz Dios, diidz ne rneedz guielmban, diidz ne gdziñ dze nitlo. ²⁴Zigne zhobneeque low, zaatne rnee:

Grèse ne nac ne miech, dzdiñ dze ne lozh ne,

lega nacse ne zig nac grè guizhye,

grè xquielndaan ne, lega nacsew zig nac guieen guizh co.

Sac tel guizhyew, zeene laaw rbidz, laa guieena rliaa!aque;

²⁵sangué Xtiidz Dios, gdziñ dze ne nitlow.

Ni lèè diidz co ga gon biadseed zho to, lèew rlu zha laa miech lo grè xtol zho.

2 Nana sca:
gundraa to grè guielntseeb,
yquidiedraa to samiech to,

gundraa to ne lagaase glu to guielwen,
gacnéd zdoos to gan to cho zha stib noded,
gzhixcuaadraa to diidzguizh.

²Sinque Xtiidz Dios goltsoxco, zeena lozh tsoibli guic to dziits so to low. Zig rzac mëdyeen ne wriin ral, nidzpaar rdziladz win guie win; scadaa golsac Xtiidz me, zeena ygaade to grë guielnë dox ne csiaab me. ³Laa to gonle ganle zha wentaa zdoos me, Xtiidz me sca goltsoxco.

Jesús nac zig tib quie mban

⁴Golbig lo Jesús, golgan ganle lëë me nac zig tib quie ne rio squin yu, per tib quie mban. Ib bleynied miech me, sangue Dios, men non, men nziuu nac me lo me. ⁵Golbig lo me sca, zeena ye to gac quie mban ne tsaa xyadoo me. To gac grë pxoz ne nlipaa mbe zdoos, gun to dziin len yadoo co; golban zigne rdziladz Dios, zeena guielmban co gac zig tib gon ne gdeed to lo me, ne nac to zha ne ngab lo Jesús. ⁶Zigne zhobneeque lo Xtiidz Dios, zaatne znu rnee:

Men ne bzo naa cxel naa Jerusalén,
me gac zig tib quie nroob ne gnaaz dziits xyadoo naa,
ni lëë yadoo co nac grë zha ne ngab lo naa.

Men non nac me, ni grëse zha ne gnalo me, ible csaand naa zho.

⁷Ne nligaa tib men non nac me lo ne, sangue grë zha ne rliladz me cholze miech rzoob zho me; zigne zhobneeque lo Xtiidz Dios, zaatne rnee:

Quie ne sca bron zho tib lad zeene quiazaa zho yu,
laaw bron zho sac rzac zho paat rquiinda,
ni niina lëëpaaw nac quie ne nlibdziits xcoc yu.

⁸Ni ziaad stib zaatne znu rnee:

Quie co griel ni miech, quie co gron zho.

Grëse zha ne néd gliladz Xtiidz me zaatne rnee cho nac me, scapaa sac zho me, ni ib zhobneele ne min co ygaa zho.

⁹Sangue to, lo Diosle ngab to, me ble to, zigne rnee lo Xtiidz me: tole nac zhipxoz me, tole nac zha non ne quiaayun xtsiin me; miech ne mbele lo dol nac to lo me, mele rnabey to sac me bredz to laa to brie lo guielcow bzëëb to lo xbiini ndzon me; zeena gnee to lo miech ganle zha nactaa grë ncuane run me. ¹⁰Glo peet nonde to, sangue niina non to sac gon lo me ngab to; glo nande to pa lotaa rquia zdoos me to, sangue niina rley to ran to ganle squitaa rquia zdoos me to.

Tibaque golgun mine racladz Dios

¹¹Bets, bzian, rleynie naa to. Ndion ne ganle, nacse xquielmban ne lo guidzliu rii zig zha ne tibrded stib ladz ben; gane rso naa diidz lo to, ib gzoobladzde to gun to grë ncuane ndzinlid ne racladz xcuerp to; sac min co rsacsi xalm miech. ¹²Golguien zaacse golgac lo grëraa zha ne gard gunbey Dios; niicle ne gneenë zho to niina, sac zho to zig cho grë zha ntseeb, per zeene gan zho ne

ndzinli nac grē ncuaaṅe ruṅ to, haxta zleyṅie zho Dios gaḷ dze ne laa Jesús guiaadguṅ guieḷwxtis.

¹³ Golgon xtiidz grēse meṅ ne nac wxtis lo guidzliu rii, sac sca rdziladz Dios: zigtaa presidenta, ne nac me zha nonraa, ¹⁴ zigtagaa grē zha ne nacie me dziina, sac zha ruṅ guieḷwxtis, rdeed zho caxtigw ne rieguiaḷ grē zha ntseeb, ni scagaa runṅon zho grē miech ne ruṅ ncuaaṅe rquiin. ¹⁵ Ible laa Dios racladz zaacse gac to, zeena grē zha nxen, grē zha yozh ne riend pe rnee, haxta ni ro zho tsod pe gneenē zho to.

¹⁶ Gollu ne peet lo ngadoodraa to, per guiabde to ne peet lo ngadoodraa to laa to guṅ grē ncuaaṅe ndzinlid ne gacladztaa to. Led scada gon, miṅe racladz Dios miṅ co golguṅ, gollu mele rnabey to niina.

¹⁷ Zaacse golgac lo grē samiech to, golguien cho lo zo to. Golḷeynie grē zha ne nacgrē to, ndooladz golgac lo Dios, golguien ne meṅ ro nac me; ni scagaa golgon xtiidz grē zha ne nac wxtis nroob.

¹⁸ Bets, bzian, to ne nac to zha ne quia xtsiin ben, golgon miṅe rnabey meṅ ne rree to; tel zhataa nac zho, zigtaa meṅ wena, zigtagaa meṅ ne ntseeba. ¹⁹ iNley golgac, goldeed xquizh lo Dios, tel porne noyūn to miṅe rnabey me, laa zho rsacsi to! ²⁰ Sac gon, telne nosacsi zho to por xquieḷntseeb to, niicle paraa cxeew to paat yquiinda; sangue tel rxecw to nosacsi miech to porne noyūn to ncuaaṅe rdziladz Dios, dzigosi zleyṅie me to. ²¹ Golgacnan ganle, ible none ted to miṅ co ne nac to zha ne ngab lo Dios; sac gon, niicxe Jesús, blactaa guieḷnē ne bded me bdiizh me xtol ne. Glo me sca bded, nana negaa ible none sca dieed ne. ²² Tel me ni tib dol beend me, ni tib miech pquidied me. ²³ Niicle zeene blooredz zho lo me, ible ptsired me lo diidz co; niicle zeene quiasacsile zho me, ib gocntseebd me lo zho; sinque grēsew psan me ladznia Dios, meṅ co guṅ guieḷwxtis zigne no gaca.

²⁴ Masaque Jesús bgaadz grēse xtol ne, blactaa psacsi zho me pquia me lo cruz bdiizh mew; laa me been miṅ co, zeena grieelo griee ne ladznia dol, gban ne zigne rdziladz Dios. Ne scataa psacsi zho xcuerp me, ga bi me grēse xquieḷnē ne. ²⁵ Glo lega nac to zig nac grē mēcwxiiil ne zonziaab, sangue niina mele quianap to. Me nac tib baxtor ne rleyniepaa to.

Zha gban zha ne ptsieelniale

3 ¹⁻² Bzian, to ne nac to meṅ wnaa ne ptsieelniale, golgon xtiidz tsieel to. Niicle tel nēd zho gliladz zho Xtiidz Dios, per zeene gan zho ne nligaa ndooladz nac to, ine ndzinli rac to, haxta zhal zho laa zho yquiabladz gliladz zhow. Yquiindraa ne goon chopaa yquia gneew lo zho.

³ Golguien sca, tsoode to ne goon dien pa xixcuaraa to par gluniow to lo miech; dieen pa xixcuaraa guitsguic to, dieen pe bguiaa or ne yquia diag to, dieen pe grē guuib or tso yan to, tso nia to, dieen pe lar niazh ne gacwraa to. Tsienalde to grē guieḷniow co, sac gon ncuaaṅe laglaase ga; ⁴ sinque none xixcuaa zdoe to, gac to tib zha tibliladz, tib zha ne ndooladz.

Lëë guielniow co nac miñe niowraa nëz lo Dios, ni miñ co gdziñd dze nitlo. ⁵Lëë guielniow co bioxco grë meñ wnaa ne biaadban padzeela, zha ne briece lo dol wban zho zigne racladz Dios; tel zha, dib zdoo zho bnalo zho Dios, ni bin zho xtiidz tsieel zho. ⁶Zig nac Sar, sca goc me, bin me xtiidz tsieel me Abraham, haxta rëb me masaque Abraham nac meñ ne rnabey me. Ni scagaa to, telne tsoxco to xixcuua to, zac to zig goc Sar, dzigosi laa to gac zig xpëed me; haxta ni tsoxtseebde to pe glisqui tsieel to lo to.

⁷Scaquegaa to bets, ne nac to zha ne ptsieelniale, goltsoxco tsoguic to zha nac tsieel to. Golgan me zigne nonguiela gan to me, golguien ganle nda meñ wnaa; ni lala, non me lo Dios, sac gon ye me yгаа guielmban ne psan Dios diidz gneedz me lo to. Sca golban, zeena scagaa zeene gnab to lo Dios, squiaadiag me xtiidz to.

⁸Nana sca, tipse golgac grë to. Ine niowse golleynie zha ne nacgrë to, miech wen, miech ndooladz golgac. ⁹Zha ne gacntseeb lo to, gunde to ne yeque to gacntseeb lo zho; zha ne coredzгаа lo to, gunde to ne yeque to coredz lo zho; sinque mazd golnab lo Dios gunlay me zho, zeena scagaa to, zunlay me to; sac gon, ible miñ co bredz me to. ¹⁰Zigne zhobneeque lo Xtiidz me, zaatne rnee:

Zha ne racladz ine gley zho ne laa zho mban, wen ted zho len ngbidz ne gban zho,

none tsoxco zho ycuëz zho ro zho, gneenëdraa zho, yquidiedraa zho;

¹¹none csaan zho grëtaa guielntseeb, niapse ncuuan wen tsoxco zho gun zho,

yguib zho cuewen miech, niicle zhagaa wen gac zho lo grëse miech.

¹²Sac grë zha ne sca wen rac nëz lo Dios, tibaque quianap me zho, ni rquiaadiag me xtiidz zho tel pe rnab zho lo me;

sangue grë zha ntseeb, ni lalnu rdziguiend me ncuuaane run zho.

Dichos zha ne mban rded lo samiech

¹³Golguien sca, ncuuaane yquiin golgun; scagaa tsod pe nacne ctsidil miech to. ¹⁴Laa telne ncuuaane yquiinaquegaa noyun to, ni laa miech rtsidil to, jdichos to ga! Ib gdziebde to grë miech guidzliu, niicle peraa gnë zho gun zho to.

¹⁵Tibililadz golgac, tibaque golgunnon Jesús men nroob ne rnabey ne, tibaque golconie Xtiidz Dios guic to, zeena nanle to pe guiab to lo zha ne gnabdiidz dien zha nacne rnalo to Jesús; ine niowse golgac, diidz ndooladz golnee lo zho.

¹⁶Zaacse sca golban, zeena grë zha ne rneenë to porne nac to zha ne no xnëz Jesús, dzin tib dze ne ctoladz zho, zeene guien zho lega bnexuu zho to. ¹⁷Wen zie zha ne ran guielnë, telne Dios rnabey gan zhow zeene noyun zho ncuuan wen; lëdle gan zhow por xquielntseeb zho. ¹⁸Golgan ganle niicxe Jesús, zha nactaa grë guielnë ne gon me. Niicle ne ni tib dol beend me, per haxta beet miech me bdiizh me grëse xtol ne nac ne miech ntseeb, psanwen me ne lo Dios.

Nli gut xcuerp me, per zhiespíritu me gutew; ¹⁹gane güeyted me zaatne niogyu zhiespíritu grë zha ne wban padzeela, güeynee me lo zho. ²⁰Lëë grë

zha co ib bzhiguield nlladz Xtiidz Dios, niicle ne dipse len dze ne nozaa Noé barcw nroob co pquiambëz Dios niac-wen zho. Nanlaxe to ganle, xonaque nac zha ne bdedlaa lo nis co. ²¹ (Lega rrieequia goc nis co zig nis ne rrobnis ne. Zeene rrobnis ne, ga rlu ne laa ne briecele ladznia dol, ygaadraa ne guielnë dox ne tsieguial zha ngoopdol, sac gon por mincopaa gut Jesús ni brieaban me; ni guiabd ne togo nis co rsanmbe ne lo xtol ne, sinque ga rxobnen ne ne laa ne rnab lo Dios ctsëë me lo xquielmban ne.) ²² Sangue niina gbaa ga no Jesús, ga zob me cue Dios nëz derech, grëse anjl non, grëse zha non ne no gbaa, rquiiitgzhib zho lo me ni run zho mine rnabey me zho.

4 Golguien ganle, zha nactaa grë guielnë ne bded Jesús bdiizh me xtol ne; nana sca, scaque to gdziebde to golcueladz to gan to guielnë. Ib rquiin guielnë, sac zha ne no tib lo guielnë, rioguid zho grë ncuaañe gunctal xtol zho, ² zëëb rguib zho gban zho zigne racladz Dios. ³ Grëtaa ncuaañe ndzinlid ne run grëraa miech, golguiaanladza. Golguiaanladz zeene scataa ptsieelsa to zho, bzudz to, lega dowcho, lega gocho to nziu, haxta bionie to zha ne nacd tsieel to; bio to lo grë lni, bleyne to grë mdio.

⁴ Grë zha co, rien naa rlëë zho ran zho rtsieelsadraa to zho lo grë ncuaañe ndzinlid co, gane haxta rneenë zho to. ⁵ Per golsaan zho, benque zha quizha zeene gacredz zho lo men ne guiaadgun guielwxtis, gal dze ne gdeed me mine tsieguial tib tib miech, zigtaa zha mbana, zigtagaa zha ne gutlew. ⁶ Sac niicle zha ne gutlew, no zho gocnanpaa zho zha nac Xtiidz Dios zeene bzomban zho. Ible rquiinpaa Xtiidz me, sac zha ne rquiaadiaga, niicle ne zetaque zho, per nëz lo Dios mban zhiespíritu zho.

Golgacnie zha ne nacgrë to

⁷ Zhile gdziñ gdze ne laa grë ncuaañe rac lo guidzliu rii nitlo; golquix biini zaacse golban, tibaque golzodiidznie Dios. ⁸ Ine golleynie grë zha ne nacgrë to, sac zeene nlipaa rleynie ne samiech ne, tel pe falt ne guntaa zho zrieelo cteed new zdoo ne. ⁹ Zha ne guiaad lidz to, goldeed zaatne cuëz zho; ine golcuëzlo zho, guieedniede to zho.

¹⁰ Tib tib to bneedzse Dios tib guielbiini lo to. ¡Golquiina sca, golgunlsa xyudar zha ne nacgrë to! Ib ga rquiin guielbiini co bneedz mew lo to.

¹¹ Zha ne rseed miech Xtiidz Dios, none gnee zhow zigne racladz me. Zha ne runгаа pe stib xtsiin Dios, ib yquiad zdoo zho none gun zhow dib nacse guielndaan ne rdeed Dios lo zho. Ncuaañe guntaa to, goltsienie guic to ne laaw gun to par csannon to lë Dios. Ga glu ne xtsiin Jesús quiayun to, men ndzon ne rnabey, men ne gdziñd dze gdzëë. Sca rieguiala.

¹² Bets, bzian, ne nligaa rleynie naa to. Golsoladz sca, tel pe guielnëtaa gan to porne no to xnëz Jesús, peet tsienied guic to, sac ib scale no gaca. ¹³ Mazd ine golley; sac gon ye Jesús sca gon guielnë, ni scagaa nroob guielbley ne tso to gal dze ne glu ganle zha nactaa guielndzon ne rap me. ¹⁴ Zeene rgodee miech to, rquiaago zho to loxaque ne no to xnëz Jesús, nley golgac; wen zie to ga, sac gon zhiEspíritu Dios nacie to.

¹⁵Guieltow sca csacsi miech to, telne bgaa to laa to beet, laa to wban, laa to bzëeb lo cuent ne riegualdraa to, pe stib guieltseeb ne noyunragaa to. ¹⁶Sangué telne rsacsi zho to loxaque ne no to xnëz Jesús, led guieltod ga. Laa ne ctoladz to, jgoldeed xquizh lo Dios, sac gon tib guielnzaac nroob bgaa to ngab to lo me! ¹⁷Golgacnan ganle, grëse ne ne nac ne zha ne ngab lo Dios, len dze rii laa ne csilo dzian guielnë. Nana, telne ye zha ne ngab lo me ted guielnë, zha naczhe mine ted grëraa zha ne nëd gliladz Xtiidz me, gal dze ne laa me gun guielwxtis? ¹⁸Zigne zhobneeque lo Xtiidz me, zaatne rnee: “Niicle zha ne wenle nëz lo Diosa, nroobaque nac guielnë ne ran zho haxta gdzin dze ne ycaania me zho, zpe lelgue grë zha ne dzigo ractseeb lo me?” ¹⁹Gacxe nagon waa, niicle tel pe nactaa guielnë ne gnabey Dios ted to, tibaque golban zigne rnabey me, golsan xquielmban to ladznia me; sac gon me nac men ne nreedz xquielmban to, ni mesi ib csaand me to.

Golgon xtiidz zha ne rnabey lo to

5 Laa niina nagon, laa naa cso choplan diidz lo to, ne nac to zha ne rnabey lo grë zha ne no xnëz Jesús. Ye naa, dziin co nac naa, naa nac tib zha ne gonpaa zha psacsi zho Jesús, ni nappaa naa zgaa naa lo guielndzon ne no me, zaatne rnabey me, gal dze ne laa me guiaad.

²Rso naa diidz lo to gon, zaacse golquianap grë zha ne bgaa to noquianap to. Dib zdoo to golgun dziin qui, sac sca racladz Dios, ib tsienied guic to guiab to dien zha lega cob to dimi lo zho. ³Gunde to ne gnabey to zho zig cho xmoz to, sinque zaacse golgac lo zho, zeena lo to cseed zho zaacse gban zho. ⁴Scagaa, zeene laa men nroob ne quianap ne guiaad, zgaa to lo guielndzon ne gneedz me, lugar co gac tib premio ne gdzind dze lozh lo to.

⁵To ne nac to zha nguieg, golgon xtiidz grë zha ne zo rnabey lo to. Tib tib to, golgon xtiidz zha ne nacgrë to, sac gon: “Grë zha niats, rdzigiend Dios zho, sangue grë zha ndooladz, racniën me zho.” ⁶Telne guiaanwin to lo men ro ne nac Dios, ine ndooladz gac to lo me, scagaa me zunnon me to zeene laa dze co gdzin. ⁷Tel pe nactaa grë zhizhgab to, grë xliaadz to, ladznia me golsana, sac gon me quianap to, noxco me to.

⁸jNsin golso lo mendox, sac gon tibaque quiana ma gnitlo ma ne! Masaque rac ma zig rac grë meedz ne rgobeedz quiaguib ma ne gow. ⁹Dziits golso gdeete to diidz yquii ma to. Tibaque dib zdoo to gólnalo Dios. Nanle to ganle dipse lo guidzliu, zha ne notaa xnëz me, scaque quiaded zho. ¹⁰Tel pe nactaa guielnë ne noyan to, ible csaand Dios to sacne rleyniedox me to, zeene laa dze co gza, hor co laa me gzhixcuaraa lo xquielmban to, gzodziits me to, guntibli me guic to. Me nac men ne bredz ne ygaa ne lo guielndzon ne no me grop me Jesús, guielndzon ne gdzind dze nitlo. ¹¹Mese nac men ne rnabey grëtaa ncuane no, ni gdzind dze ne gdzëe me. Nligaa sca nac me.

¹²Laa naa rxel guits rii lo bets ne Silas, ziaadnie mew lo to, bets ne rne naa me, sac nligaa dib zdoo me rleynie me Dios. Mine rne naa lo to lo guits rii,

laaw rne naa sac racladz naa guien to ganle pa lotaa noxco Dios to, pa lotaa rleynie me to; zeena tiblque gac to gbichede to lo me.

¹³Grëse zha ne riladz Jesús Babiloin nu, zha ne bzooblo Dios gac xpëed me zigne bzoobloque me to, laa zho rxeel bdiuzh lo to; scaque Marcw, men ne rzaac naa nu zig tib xpëed naa, ye me laa me rquiaabdiuzh to. ¹⁴Laa naa rnab lo to, golquiaabdiuzh grëse zha ne nacgrë to, ine golxen nia zho.

Dios gacnien to peet zhgab ctsebde to, nac to zha ne no xnëz Jesús. *Pedr*